


EKONOMI

Peranan Politik dan Kadar Vaksin Dalam Membantu Pemulihan Ekonomi Negara

Dr. Nurazilah Zainal, Zarifah Fadilah Ramli, Hilwana Abd Karim, Nur Alia Amirnordin, Norhaniza Md Akhir dan Tengku Sharifeleani Ratul Maknu Tengku Sulaiman



Untuk mencapai kadar pemulihan ekonomi yang sihat, dua faktor telah dikenalpasti dalam usaha pemulihan ini iaitu kestabilan politik dan kadar vaksinasi yang tinggi. Keadaan ini dapat dibuktikan apabila pasaran pelaburan negara telah mula menunjukkan kadar pertumbuhan yang amat menggalakkan sejak kebelakangan ini.

Secara amnya, ketidakseimbangan politik telah menimbulkan satu persepsi dimana rakyat semakin hilang kepercayaan terhadap sistem politik di Malaysia. Bagi memerangi wabak ini seluruh rakyat Malaysia perlu bersatu hati bagi memastikan kemenangan berpihak kepada mereka kerana menghadapi cabaran politik dan pandemik merupakan satu cabaran yang sangat besar dan boleh diumpamakan seperti nakhoda kapal yang sedang menggerudi kapalnya dalam ombak yang gah dan sudah pasti keadaan ini memerlukan segala pengalaman politik dan dokongan dari semua pihak bagi mendapatkan semula kepercayaan rakyat untuk mentadbir negara secara efisien.

Pembentukan Jemaah Kabinet baru-baru ini telah melibatkan seramai 69 ahli Parlimen dan Senator dimana 31 daripada mereka dilantik sebagai Menteri manakala selebihnya iaitu 38 lagi dilantik sebagai Timbalan Menteri. Seajar dengan itu, YAB Perdana Menteri, Dato' Sri Ismail Sabri memberitahu, beliau akan mengadakan pertemuan dengan wakil-wakil sektor perindustrian, dewan perniagaan dan usahawan belia bagi tujuan mendapatkan kerjasama mereka di dalam usaha kerajaan baharu untuk memulihkan ekonomi negara dengan dibantu oleh Jemaah Menteri dan Kabinet yang sedia ada.



Fokus utama yang perlu diberi perhatian dalam pentadbiran baharu ini haruslah lebih tertumpu untuk mengimbangi isu kesihatan dan ekonomi yang telah melanda negara sejak dua tahun ini. Dari aspek kesihatan, semua sedia maklum iaitu negara-negara di dunia sedang bertungkus lumus memerangi wabak Covid ini. Di Malaysia, Program Imunisasi Covid Kebangsaan (PICK) telah mencatatkan prestasi yang cemerlang apabila kadar pemberian vaksin negara kita merupakan antara yang efisien di dunia. Dengan kejayaan seumpama ini, kerajaan baharu perlu mengekalkan momentum untuk mencapai sasaran 2 dos vaksin lengkap untuk rakyat dewasa bagi mencapai status imuniti kelompok. Program vaksinasi ini juga telah menampakkan keberkesanan yang positif apabila bilangan pesakit di wad ICU dan bilangan pesakit di pusat kuarantin semakin berkurang. Walau bagaimanapun, kerajaan baharu perlu sentiasa berwaspada dan tidak boleh berada dalam kedudukan yang selesa kerana bilangan jangkitan Covid-19 dalam komuniti masih mencatat bilangan yang tinggi.

Selain dari isu kesihatan, pentadbiran baharu ini juga haruslah menitikberatkan kelangsungan ekonomi negara terutamanya bagi golongan rentan. Selagi PKP masih dilaksanakan, kita dapat lihat kesannya kepada ekonomi negara apabila negara mengalami kerugian hampir RM 1 bilion setiap hari. Selain itu, kadar pengangguran dan miskin tegar juga dilaporkan terus meningkat. Melihat kepada keadaan sekarang, beberapa sektor ekonomi telah pun dibenarkan beroperasi terutamanya negeri-negeri yang telah berpindah dari fasa satu ke fasa dua dan fasa tiga dalam Pelan Pemulihan Negara (PPN). Namun begitu, selagi kes Covid-19 masih di tahap tinggi, selagi itulah ekonomi negara akan terkesan. Jika dibuat perbandingan, krisis pada kali ini amat berbeza dengan krisis ekonomi yang melanda negara seperti pada tahun 1997 dan 2008 dimana puncanya berkaitan dengan ekonomi dan jalan penyelesaian juga adalah berdasarkan strategi ekonomi. Krisis kali ini merupakan krisis kesihatan global yang tidak dijangka. Jadi untuk pentadbiran baharu, ini merupakan cabaran yang getir dimana pemulihan ekonomi bergantung sepenuhnya kepada kecekapan pentadbiran negara dalam membendung wabak Covid 19 ini.



Pembentukan kabinet yang telus dan adil amat penting dalam memacu pentadbiran negara yang cekap lebih-lebih lagi di musim pandemik ini. Saiz kabinet bukanlah satu penentuan kejayaan sesebuah kerajaan itu, tetapi ia harus memastikan ahli parlimen yang dilantik mestilah benar-benar berkelayakan dan berkebolehan bagi menerajui portfolio masing-masing. Pembentukan kabinet perlulah mengambil kira pengalaman dan kepakaran khususnya dalam pemulihan Malaysia secara menyeluruh.

Salah satu usaha proaktif dari kerajaan baharu yang kita boleh lihat baru-baru ini adalah, kerajaan melalui Perdana Menteri telah mewujudkan Majlis Pemulihan Negara yang berbentuk lebih terbuka dimana beliau telah menjemput pihak pembangkang untuk turut serta dalam majlis tersebut. Selain itu, jemputan ini juga telah dipanjangkan kepada pakar-pakar sebagai satu ruang untuk memberi input dan bertukar idea bagi menyelesaikan segala permasalahan yang timbul. Kita berharap, kerajaan baharu ini dapat beralih kepada sistem *Whole of Nation* dalam memerangi pandemik Covid-19 ini.

